

续明纪事本末

續明紀事本末

續明紀事本末卷之十六

東南殉節

江都倪在田甫輯

僉都御史左懋第聞將遣使臣自以母喪在北請行陳洪範馬紹瑜副之行次北京以
衰經入或訝之曰國喪也且有母喪又爭待使臣禮乃館之鴻臚寺剛林責朝見曰未
謁梓宮不敢見時剛林猶未悉中朝事洪承疇教之懋第與之反復辨論聲色俱厲剛
林亦心折索國書不予以金幣及謁陵物見之使參謀陳用極請期不許乃帥將士哭
臨三日多爾袞重其節使還以陳洪範謀復自滄州執懋第還拘諸太醫院承疇李建
泰等往責之不屬明年從將劉英曹遜金鏞踰垣入懋第爲遺疏使還奏則金陵沒
矣遜曰如何懋第曰天命若此復何言絕粒七日痛哭誓死值使懋第等皆去髮懋第
與陳用極游擊王斌王廷翰張良佐及守備劉統皆不可副將艾大選傳濬首從令懋
第執大選杖殺之濬懼爲蜚語遂下懋第獄再令去髮大呼不可多爾袞責其立君用
兵抗禮匿國書殺總兵罪懋第辯侃侃多爾袞以詢諸降臣陳名夏請殺之懋第曰若
先朝會元何面目在此又責金之俊曰女乃無恥遂殺之神氣自若南向四拜曰臣事

大明之心盡矣爲絕命詞曰漠漠黃沙少騎過片雲南下意如何寸丹冷魄銷將盡蕩作寒烟總不磨端坐受戮刑者泣下死時大風晝晦捲市棚入雲際趙開心啟救懋第已死用極一斌廷翰良佐統皆抗節死

懋第死於北以自南京往者故列之

統卽所稱藍面將軍也驍勇冠羣而青面云

治中蕭協中與高桂許來春共守泰安州城陷協中入井死同死者舉人徐柟罵賊城上死生員王德昌巷戰死匡國鉉溺井死房伯龍黃應瑞蕭獻吉楊應薦脫曾隆趙聖文先後不屈死布衣馮魁軒闔門自焚死

海豐教諭厲必中日照人也聞京師陷不食死

長山農者鞠鳴秋聞莊烈帝變大慟自縊死時霸州鄉民猶演劇人之相去如此國子監博士沈迅及弟迓居萊陽貢武技結砦自保捕諸土寇略盡滿州軍攻之合門皆死廣靈知縣阮泰家居洛陽聞京師陷衣冠望闕拜不食死妻朱氏從之歸德通判張崇垣聞變以身殉商城知縣張國光聞變北鄉而拜自縊死儀封知縣陳三益聞僞使至同官勸出迎碎所佩印不屈死信陽布衣岳光奇聞變躍入井中死輝縣農者牛億富

方芸聞莊烈帝崩走百泉躍入水中死及多鐸兵南巡按御史凌嗣以數百人入滿家集或招之降斬之欲自裁衆共持之使其將以遺疏誥勅還南京投其印於井中俄聞豪格令必生致凌御史否且屠歸德歎曰與其慷慨殃民曷若從容就義乎與從子潤生入其軍豪格雅重嗣酌酒勸飲辭執學道蔡鳳監軍道吳瑞斬階下嗣知其意曰吾早辦一死來矣乃送之館贈以大幅貂裘革局並不受夜與潤生縊遺書豪格曰世受國恩濟之以死願將軍無負初心永敦鄰好大江已南不必進規否則揚子江頭凌御史卽錢塘伍相國也豪格歿之

徐州諸生王養心聞北都陷絕粒七日死分防徐沛游擊朱賢盡職死

邳州諸生陸台輔忿劉澤清張飲衰絰入見責之曰國破君亡乃若此乎王躡使引去視其倉粟曰盡此死明年粟盡再拜自縊死石樓寺僧歛之畢亦死

總兵侯方巖獨以其部援泗州力戰而死一軍盡沒

贛榆都司王有年守備某以禦北兵力戰死

鹽城諸生李朝才聞莊烈帝崩不食死

督師太傅兵部尙書建極殿大學士史可法在軍暑不張蓋夜不解衣食不重味四十
無子夫人欲爲之置妾太息曰王事方殷敢爲兒女子計開府揚州除夕遣文牒夜半
索酒醑肉分盡乃取鹽豉下之思先帝泣憑几而寐詰旦未寤知府任育民曰相公此
臥不易也命仍擊四鼓親料文牘從者諫婉謝之覆多爾袞書義炳星日及自白洋河
還諸諸鎮皆叛惟總兵劉肇基應檄至過高郵不見妻子請戰不從乃分守北門炮殺
攻兵頗衆副總兵莊子固有衆七百自歸德馳三晝夜至一軍皆刺赤心報國字可法
督之守揚州爲書辭母妻及伯叔兄弟呼部將史大威曰我無子汝爲我嗣以奉吾母
我不負國汝無負我死當葬我高皇帝側其或不能梅花嶺其可也固守揚州以西北
門險自當之苦城堙隘屬板民房便登降語諸幕佐使之行故應廷吉等多自便多鐸
日轟城牆堞皆摧可法猶誓守忽傳黃蜚救兵至又訛爲黃得功軍城乃陷論者謂可
法棄白洋河一夕返揚州天長六合並不守揚州自削然可法之出一撓於馬阮再掣
於諸鎮卒敗於左良玉之叛倉卒濟江勢無可爲宜其敗也莊子固許瑾瑾官副將擁可法
及小東門瑾中流矢死子固以其軍力戰死可法大呼曰我督師也遂被獲擁見多鐸

勸之降厲聲曰吾意早決與城俱亡乃殺之肇基以四百人巷戰殺傷千計力竭而死副將乙邦才驍勇善戰城破自刎死中軍旗鼓馬應魁每戰披白甲文曰赤心報國亦巷戰死員外郎何剛以水師隸可法馬士英惡之出知遵義府可法垂涕曰子出吾誰倚剛亦泣誓相依及多鐸兵南剛以軍入揚州可法曰危矣不如出號召以圖從剛歎曰天命已去誰復應者剛爲君則死之爲知己則死之濡忍無成非智士也城破以弓弦自經死庶吉士吳爾壘斷指遺父曰盡家財以昇軍身不歸指可葬也從守揚州入井而死幕客廬涓率諸生上疏請毋以可法出督師有秦檜在內李綱在外語又與歸昭輩同居禮賢館量授官職分守鈔關自沈於河揚州知府任育民緋衣坐堂上被殺血漬礎石至今不滅江都知縣周志畏既受代繼者羅伏龍甫三日兩人皆死惟可法尸不可得多鐸爲招魂葬之梅花嶺大威歸山西歲時一省視之至餘運使楊振熙僉事黃鉉同知王纘爵曲從直知縣吳道正縣丞王志端訓導李自明及督師衛允文在籍侍郎張伯鯨中書舍人陳燠舉人伯允

卽燠子

幕客胡如恒顧其龍龔之厚陸皖唐

經世

其十二人不得其名

諸生高學纘王綉王纘陳某

今其地呼陳秀才墳云

及宋祥遠夫婦韓默暨妻蕭氏

子彥超及汪應坤張映發劉慶遠王廷佩佩弟廷瑜廷璉史大相史大儒金鼐呂家齊饒餘汪自盤皆死武臣副將婁挺汪雲龍李豫參將陶國柱馮國用陳光玉李隆徐純仁游擊李大忠孫開宗龔臣都司姚懷隆解學曾指揮高一麟武生戴之藩義民張有德馮應昌陳天拔陸愈舟子徐某及可法之僕史書與諸婦女死者不可勝紀如臯布衣許德溥聞揚州陷刺其臂曰生爲明人死爲明鬼遂抗節死妻朱氏殉之

和州諸生張秉純徐正夫聞北都陷秉純絕食死正夫自縊死含山諸生張不二號泣絕粒死又諸生某亦死

安嶽巡撫張亮爲左夢庚所執挾以行乘間赴水死參將孟振邦同知王心詔皆不屈死懷甯胡士恂遇害二子丹寅紹虞悲憤不食死桐城諸生周日曜絕粒九日死故濟南僉事劉世芳英山人聞莊烈帝崩痛哭嘔血死

鎮江知府某丹徒令某推官某參將徐永春皆死其後侍郎葉廷秀以隆武帝歿去爲僧卒以憂死

光祿寺監管自修江甯人聞賊陷北都具冠服肅拜絕粒死右參議王若之流寓金陵

聞京師陷北向長號不食死欽天監挈壺正陳于階知不可爲自縊於署時多鐸軍猶未濟也故甯國知縣錢敬忠三上疏諡時事馬士英格之遂歸自稱崇禎遺臣臥病不出明年多鐸兵濟仰藥死孝陵衛董啓明官爵姓字皆未詳以北都陷自經死及宏光帝去戶部郎中劉成治見趙之龍入封庫府奮毆之之龍走免已聞多鐸呼人降曰國家養士三百年無一忠義報朝廷邪題其壁曰鍾山之氣赫赫洋洋歸於帝側保此冠裳自縊而死禮部主事黃端伯或勸之走曰臨難苟免我豈以僧活者爲一帖與多鐸曰大明忠臣某多鐸招之不至撻其妾以誘之不顧曰殺耳我必不謁也乃執之問宏光帝馬士英狀皆賢之下獄爲明夷錄多鐸曰文山終不負宋也乃殺之刑者左手刃忽自顫右之亦然端伯曰吾心不死耳曷刺吾心乃死一僕拱立於其側揮之不去亦死主事吳嘉允奉使出郤還謁方孝儒祠曰令後世知我與先生同志自縊死中書舍人劉廷祥曰固知國祚必移不謂若是之速以書與子善事祖母吏部主事路天閑約同謁文廟死天閑跪而逸廷祥曰吾不負師友也投武定橋死又吏部尙書吳應璫刑部尙書高倬光祿寺卿葛徵奇戶部郎中徐有聲郎中劉萬春劉光弼國子監丞陳

正龍國子生吳可箕武臣孝陵參將杜學伸武舉黃金璽布衣陳士達小奄某申佳允之僕某武定橋輿人某百川橋乞者某皆死乞者且爲詩題橋柱蓋非常人也而東甄王十三世孫湯南金聞永歷帝入緬後絕食死開平王裔常元亮至永歷帝已亡猶訣妻子告墳墓航海說鄭成功使大舉行至舟山不得渡發憤蹈海死金壇縣諸生王崇圖王榮圖王明高俱以王明徹死布衣王汝紹亦死六合未被兵諸生馬純甫獨礪節死自題橋柱曰與死乃心寧死乃身一時廷事千古完人

祁門舉人馬嘉聞莊烈帝崩自縊死

金璽謀募兵守南都未成而死故列死節

故定海知縣孫茂華南陵人聞北都陷自縊死

布衣陳公輔貴池人聞莊烈帝崩痛哭自縊死

銅陵知縣胡鯤化典史胡國璫訓導張緬皆勵節死

東流知縣陳九萬城破死之而都司董四明則先死南都云

吏部尙書張愼言乞罷資銀幣誥蔭愼言表辭曰先帝山陵未卜而臣祖父先受絲綸青宮皇子安在而臣子妄叨恩蔭況風塵不起驅逐虎豹回首長安諸陵松楸禾黍諸

臣何以爲心而侈論乎及陞辭宏光帝曰晉疆未復卿已無家沿途僑寓待召可也慎言止池州孤孫來侍曰祖孫相聚足矣國亡後抑鬱甚疽發於背命無藥卒年六十九興安州同覃天明致仕歸太平聞變不食死及左夢庚陷太平訓導王德明攜妻妾入水死

靖國公黃得功杭節死夫人翁氏盡沈其軍資於江赴水死其家合葬之方山總兵翁之琪入水死

督師大學士黃道周雅見重於隆武帝鄭芝龍嫉之道周旣出師及芋源賦詩自勵請餉不得隆武帝知之賜以御札號召之下更得百人有譖其通外藩者隆武帝不信馳使告道周疏言臣田無一畝居無一椽幸以是見憫於主上然不能見憫於豺狼行年六十獨持一片血腸爲高皇帝列宗與天下黎獻相對於白日一月之內四疏乞師凡諸子弟慕義勤王雖天性使然亦恐臣孤隻耳每一相見涕泗淪漣溽暑未收毒水四下建寧已還渴而道飲病者八九一日下操十隊之士半呼不起遂損健將陳伯輿念其射力盡於盂水四顧環堵何能不哀今復稍平遂勸出關此亦臣子願曾受朝廷之

眷乎而攄積若此在廷之臣不共瞻薪而望影射沙此何爲者帝手札慰諭之遂出分水關宵化諸生李世熊上書道周極言孤軍無助徒以一身欲爲王翦呂尙所不能殆必不可道周不聽以其軍歷廣信衢州復合數千人至徽州俄樂平陷廣信士夫逐道周還義不反顧至婺源戰敗部將陳嗣聖死之道周以馬十匹兵三百人進張天祿猝至道周分部力戰參將高萬榮請登山憑高以視方移師黃樹以邑人習水勢導天祿兵自間道出飛矢雨迸軍士皆潰道周被執天祿追之至於祁門江灣街口一軍皆燼遂致道周於南京博托重之洪承疇等承其指使說道周且去髮道周曰若從薙髮國來故薙其髮若從穿心國來將穿心耶承疇請見叱之曰承疇死久矣卒不見從容著述或求作字無不應通判蔡春榮賴繼瑾皆以門生幕客同被獲春容爲家書道周題其函畔曰蹈仁而死履險如夷有隕自天舍命不渝書賴繼瑾函曰綱常萬古性命千秋天地知我家人何愛臨刑書絕命詞衣帶間至東華門曰此近高皇帝陵可死矣南面再拜端坐受戮隆武帝聞之慟哭贈文明伯伯諡忠烈道周精易理自知死難而必爲同死之者蔡春榮賴繼瑾趙士超毛玉潔訓導吳士鏞總兵曾德黃輝先副將蔡璋龍

勝陳華陳勝陳辰游擊華志忠諸人皆抗節焉而太僕卿劉振之姚奇允分巡道彭士望監生涂仲吉諸生何瑞圖呂叔倫皆道周門生也先後並死節云

常州諸生文乘及其叔震亨並不去髮死石生某逸其名投西廟池中死諸生顧所受作捲堂文復爲詩自縊於學宮遇救復入泮池死董元哲慟哭死賣扇者某亦入池中死文城壩賣柴人聞安撫使至棄其柴及舟入水死無錫諸生嚴紹賢聞變徬徨太息題詩壁上及其妾縊死孫源文破家刺血疏籲先帝慟哭咯血賦詩悲憤其友詢後事曰家受特恩死吾分也不及其他員外郎華允誠屏居墓所距南都亡已四年堅不去髮逮至江甯滿洲漢人多爲言允誠直立舉手曰二祖列宗允誠髮不可去也賦絕命詩被殺死從孫學濂與被執將宥之不可亦死僕薛誠聞允誠被執痛哭不食先一日死訃至僕宋孝號泣觸柱死武進諸生許某被執見降臣王國寶毅然曰生無他志但不忘明耳今日之事得含笑而去不願含淚而歸也解南京殺之宜興故巡道高作霖去爲僧丹陽諸生王介休死焉

吳縣聲叟某樵於洞庭山中聞莊烈帝崩自投震澤湖死

長洲督學僉事周大啓不食死諸生王家口顧維實俱以莊烈帝崩死

原任少詹事徐汧題其襟曰汧乎而忘三月十九日乎及蘇州降慨然太息朱徽使入死於郡汧曰我尙有家乎作書戒其子舉人枋自投新塘死曰留此不去髮不屈膝之身以見先人於地下其僕某老矣汧死僕亦死及歛汧哭臨者千計有衣諸生服者馳而至卽躍入劍池中死共憐其義偕汧葬之卒不知爲誰也元妙觀齋麵者夫婦蓄鴉叟薛某皆死

常熟知縣王鏊及符道煥偕死諸生徐嶧衣冠入泮池死題其壁曰不欲立名垂後世但求靖節答先朝布衣屈坦之祝舜齡俱以北都之變自經死諸生蕭某妻被掠至蠡口見同列受污大罵人何得偶狗彘兵縛諸旒支解之且食其心衆皆曰此烈婦也潛瘞其一體

太倉呂琦雲以救父死諸生計翼明自縊死徐守質以母病不肯去兵至母及妹入井死守質曰吾不辱身踞井罵而死其友馮知十亦諸生見之而憤力與兵鬥叢射之死諸生殷獻臣號哭死

華亭教諭睦永明諸生載泓在籍尙寶寺丞徐念祖及妻張氏妾李氏皆死衣工陸厚及妻自焚死

嘉定訓導劉芳遠以莊烈帝崩整衣冠北向而拜坐於明倫堂自刎死

上海里居按察副使顧回縉以北都陷不食死

金山衛世襲指揮使廖承祖將往松江助義兵吳志葵不可承祖曰我自與金山存亡耳與子世祿亟治兵及被攻承祖躬當矢彈攻者上手刃墮之屢進屢卻及李成棟兵來助奸人內應乃陷父子巷戰承祖身受四十矢罵成棟不絕口死世祿被執使降曰食祿二百八十年不當一死報國乎行及文廟曰吾死所也再拜而死

承祖爲廖永忠裔謂侯姓者非

參謀黃銘丹從沈廷揚募兵崇明且詢魯王聞廷揚入舟山撫膺曰事不可爲矣南向痛哭赴海死妻施氏從之銘丹故崇明諸生當流賊覆鳳揚焚祖陵憤訣妻子誓必滅賊因獻平寇策於當事史可法引之爲參謀及廷揚以光祿駐淮安銘丹謁之曰丹在史公處無可見願假一旅自效因使募兵崇明甫次浙江而監國去銘丹遂死及鄭成功攻崇明定南伯徐仁壽力戰死

原任通政司陸培居杭州兵至培將死或止之培曰需者事之賊不見北都某某乎妻固防之培給之他乃自縊或救之甦大恨上書辭母揖二僕受以袂曰宜成我志坐而縊死錢塘知縣顧咸正大學士鼎臣之孫也聞張秉貞議降力爭不可秉貞竟以潞王降而使咸建往犒師還取諸丁糧戶籍盡焚之走被執殺於六月蠅不集其首者旬日臨安知縣唐自綵固得民歎曰無食無兵守之苦父老耳然我豈可仕二姓乎走之山中新令誣其通魯監國執之自綵及妾皆不屈死從子階豫自綵揮之走不可亦死主事王道焜謂子均曰北都不死將有爲也今何望哉自縊而死訓導過俊明已棄官復值丁祭冠帶執笏與諸生往曰官不爲祭不可缺也被執大罵死在籍通政司陳繼新袖石赴中洋死編修徐復儀從魯監國於浙東事敗奔歸別父母妻子入山中聞兵至扼喉死詰旦父奔至曰兒得死所矣目乃瞑諸生方天簪衣冠自刎死諸生諸復幅巾詣羅木營死諸生陳世仁妻錢氏及世仁姊陳氏匿富春山中兵逼之錢及三歲兒赴水死陳被擁使騎六扶六自顛兵怒殺之斷其體爲三諸生蕭某妻不受污支解死潮州司理李毓新居嘉興兵至被殺次子禎先抱父屍而死訓導陸世鉉平湖人甲申

變聞大慟絕粒死

大學士高宏圖流寓紹興聞南都陷日惟一食祈死劉宗周等謀立潞王宏圖曰天之喪明若稽夫徒苦江東父老吾籌之熟矣托其子於門人絕粒死時博托以書幣招劉宗周等宏圖與焉使至宏圖已卒遂致參貂於殯宮太息去舉人高岱聞城陷不食呼子朗與訣朗跪請先遂奔僞江兄澄追之曰汝當奉事朗曰死與養孰難子爲其難者躍入水舟人持之嚙其臂已自水出整巾於首而沒岱曰是能先我遂絕粒死舉人葉汝蘅出居桐塢岱送之曰君殆隱乎曰非也我無城守責死於墓耳與妻王氏赴水死或救王得甦明日復死之布衣倪文徵讀書諸暨間不試不娶聞變市大璧二運祖墓語人曰吾明人今不死非明鬼矣攜書端坐其中使合之曰度吾瞑則瘞吾竟日聞誦聲呼之不答逮夕而絕遂葬之布衣朱熒僞爲出而書其几曰志不可奪家人見之曰是必死矣詢諸人知其拜墓入水而死父號之曰兵且至將守汝以死乎抑棄汝乎尸踊而出角巾卓立引之並岸亦不仆時年二十四諸生方炯朱端亦會稽人並死章有功會稽農也應募敢戰以指揮爲前鋒華夏謀洩攻者益急有功所將五百人每戰必